

痘疹定論

上

二

近仁藏



偏者堯舜參牟子者未聞面以疾而
易美惡者也今孩幼之以痘而易美
惡者多矣則三代時無痘明矣自宋
元以來劉守真錢仲陽張潔古王海
藏朱丹溪之徒始見於方書朱氏後
出力闢諸家膠執痘屬心火之說其
為胗涼溫攻補不拘一法其自為論
數篇皆精微切當而胎毒蘊于命門

一語則尤破的之論也蓋朱氏之學
實本於清江聶氏聶氏名尚恒明萬
歷間人曾尹汀之寧化所著活幼心
法板度閩運使庫故其書初不大顯
幸得朱氏尊信之為之盡發其覆而
又益以已所心得于是世之為小兒
醫者乃今而後知有聶氏之傳相與
誦明而代守之則孩幼之獲全者廣

矣其功豈不偉哉至其所云馬伏波
征武溪蠻病痘而卒從此毒纏中國
則未攷史之過也按後漢書馬援傳
暑甚士卒多疫死援亦中病卒則援
之死由暑疫烏得強以痘實之以重
誣古人哉吾觀宋菴文志洎晁昭德
鄭夾漈所錄小兒諸方書當有論痘
疹所始者惜久而皆佚則朱氏所徵

引或轉以滋學者之疑故附辨焉因
廣陵同人重梓以廣其傳余僭序其
端云

乾隆三十有四年歲在己丑日在柳
雲間沈大成撰



痘疹定論自序

痘疹者何。原於胎毒。感於時氣。發出而爲痘。與疹之證也。定論者何。前此之論未定。而今日始定之也。何言乎前此之論未定。而今日始定之。必有說也。前此言胎毒有因慾火之所致。有因恣食厚味。辛熱炙燂之所由。有因降生之頃。口中含有穢血。未得取出。嚥下入胃之所自也。殊不知皆非確論。與理不相入也。易曰大哉乾元。萬物資始。資始者氣之始也。又曰至哉坤元。萬物資生。資生者形之成也。夫人之有生。受氣於

父成形於母。則胎毒亦隨之。而根於陽。施陰受之。始豈待成胎之後。慾火不忌。厚味不節。降生之頃。嚙其穢血。而後有是毒耶。前此又言胎毒藏於五臟。故有痘出五臟。疹出六腑之說。殊不知陽施陰受之始。成其胎元。先有命門。則胎毒必隨其氣化。而藏於命門。真且確矣。自命門之陽動。陰靜。而生水火。本金土。夫天一生水。生腎也。地二生火。生心也。天三生木。生肝也。地四生金。生肺也。天五生土。生脾也。此皆逐日逐月漸次生成。及胎成五月之後。而五臟六腑始有定

形豈命門所藏之胎毒至此又將陰毒遷移於五臟而爲痘。復又將陽毒轉移於六腑而爲疹。不惟無此事。并且無此理。然命門體也。五臟用也。六腑又五臟之用也。胎毒藏於命門。所藏者陰陽之氣也。陰陽之氣藏於命門。至深至密。形氣俱泯。必賴五臟六腑傳送時令之氣透入命門。感痘之氣而爲痘。感疹之氣而爲疹。他如幼科雜病。命門不相干涉。因以知五臟六腑爲命門之用也。前此言惟腎無候。又曰變黑歸腎。何言之不合於理。殊不知五臟相須而成。缺一不

可也。痘中之漿血所化也。血非水不生。既藉腎中之水以生血。烏可曰惟腎無候。至於變黑。毒火燥燥。變其色也。豈歸腎之謂乎。前此言胎毒重則出痘與疹必逆。殊不知胎毒有順而無逆。猶人之性有善而無惡。然人之爲惡。氣稟習俗之所移。痘疹之爲逆。時令濁氣之所變。稍能明乎陰陽氣化鼓舞兩間。其中有清濁邪正之分。乘其清正之氣。得清正之痘。癰出順症之痘。歷歷有驗。則知胎毒之所以爲痘。止有順而無逆。疹雖無癰可理。然得其清正之氣。亦趨於順。

予經今五十餘年以種痘深得胎毒細微之理
并透徹胎毒純粹之精有順無逆決無虛謬前
此之名家業是科者代不之賢而論証用藥不
偏於寒則偏於熱惟清江聶久吾諱尚恒者生
於隆慶末年著有活幼心法論痘與疹極其詳
切有據訂方用藥極其中正無差予乃遵其成
規發其蘊奧補前哲之所未詳刪方書之所不
合然此痘疹定論稿雖草創於康熙二十年以
前尚未全備適值

欽差內務府廣儲司郎中徐公諱廷弼者奉

旨來饒製造御器特到江省傳

皇上旨意命江西督撫考選種痘并明於醫藥調理

者兩人有江省督糧道李公諱月桂凡各屬

呈送到來醫家不知凡幾李公問醫等痘疹

始於何時胎毒藏於何處種痘自何人立法痘

書以何人爲的議論以何人爲當辨別以何人

爲詳痘有虛實寒熱藥有補瀉溫涼方有君臣

佐使治有標本先後畧晰明白方合吾選獨於

儔衆之中挑選予與陳添祥二人於本年七月

二十二日自江省起程八月十四日到京次年

奉

旨選種試苗。俱皆全愈。然後奉

旨在大內遇喜處種痘。復又差往邊外。各蒙古地方。歷歷俱獲全愈。因此身歷邊境。南北之水土強弱。貴賤之元氣虛實。一一判然於中。在京二十六年。又經見自出之痘。內有怪症變症。前此所未見者。又添一番見解。於此分晰臚列。始爲全備。茲蓋恭逢

皇帝陛下

御極五十二載。天元花甲初週。實乃萬壽無疆之

期歡騰中外慶溢臣工車書一統海宇昇平時
和年豐民安物阜予叨

皇恩較之諸醫

特恩有加無已。賜予居址。授爵御醫。靜夜自思。年將
老朽。無以仰報。

高厚隆恩。謹將心得之餘。分別條例。極其明白。著
爲痘疹定論。刊刻流傳。將有得是論而熟讀之。
異日應

詔上爲


聖子

神孫

公主

郡主種痘。種苗有一定之成規。調理有萬全之
法。則不爲淺見狹識所搖惑。亦可以補助
國家萬年無疆之福矣。更有高明鑒閱。必再加
討論修飾。以補未備。是乃予之深願。而期望於
後此之同志者。寧有旣耶。殷生於江右。新建年
近八旬。定論之內。未免辨別是非。言辭激切。極
知僭踰。無所逃罪。然廣後學之見聞。未必無所
資助。是爲之序。

康熙五十二年歲在癸巳春三月上浣之吉太醫院
御醫豫章朱純嘏玉堂氏謹識



後跋

大哉定論之書也探頤索隱鉤深致遠而難以
言語形容者而先生發前人之所未發特揭而
指示之其辭文其理當其事直而中其比類也
雜而不越其辨別也顯而不晦其立標準也簡
而易其刪削其存留俱取正於聶氏不僅作痘
疹之書而已當與性理大全互相參看曲禮有
云太上立德其次立功其次立言先生之定論
非止立言已也澤被天下非德乎言垂後世非

功乎將見普天之下業幼科者得是書而熟讀
之知胎毒藏於命門命門中之陰陽是痘與疹
之胚胎胎毒之陰發出而爲痘胎毒之陽發出
而爲疹直破千古似是而非之論故曰發前人
之所未發由茲反覆玩味漸得著書立言之旨
將必立誦家傳起赤子於襁褓之中其德與功
豈淺鮮已哉

年家姙弟秦大岡牧伯氏頓首拜撰